

# Pusat Tamhidi pertahan kejuaraan debat USIM

**SEREMBAN 7 April** - Debat Piala Naib Canselor Universiti Sains Islam Malaysia (USIM) yang memasuki edisi kelapan penganjurannya pada tahun ini menyaksikan Pusat Tamhidi berjaya mempertahankan Piala Pusangan Naib Canselor USIM untuk tahun kedua berturut-turut.

Pertandingan itu melibatkan perdebat yang mewakili fakulti masing-masing di USIM menjadi antara program utama berbentuk pengucapan awam yang dinantikan setiap tahun.

Majlis kemuncak Debat Naib Canselor menyaksikan pertandingan akhir debat bahasa Melayu yang menampilkan peserta dari Pusat Tamhidi yang bertindak sebagai wakil kerajaan berhadapan Fakulti Sains dan Teknologi (FST) sebagai pembangkang yang memperkatakan usul *Rancangan Gosip Hiburan*

*di Televisyen, Dibiarkan Menjadi Parah.*

Acara itu berlangsung di Dewan Kuliah Pusat 3 dan telah dihadiri lebih 500 pelajar dan tetamu.

Pengarah program debat, Amir Najib Abd. Hadi berkata, penyertaan untuk edisi kali ini amat baik iaitu keseluruhannya 57 pasukan dengan bahasa Melayu sebanyak 21 pasukan dan 18 pasukan lagi berentap dalam debat bahasa Inggeris dan bahasa Arab.

"Bagi menarik minat pelajar dalam bidang pengucapan awam, pengurusan universiti telah meningkatkan hadiah wang tunai untuk pemenang pada kali ini.

"Johan, naib johan dan pendebat terbaik bagi setiap kategori menerima wang tunai RM1,000, RM800 dan RM500 selain sijil penghargaan.

"Acara itu merupakan platform terbaik untuk mengenal pasti barisan pendebat muda yang boleh diserap dalam pasukan USIM pada pertandingan yang lebih besar," katanya.

Pertandingan akhir debat bahasa Melayu dan Majlis Penutup Kejuaraan Debat Piala Naib Canselor USIM disempurnakan oleh Naib Canselor USIM, Prof. Datuk Dr. Musa Ahmad.

Yang turut hadir Timbalan Naib Canselor (Hal Ehwal Pelajar dan Alumni) Prof. Datuk Dr. Mohamed Asin Dollah dan Ketua Bahagian Hal Ehwal Pelajar USIM, Nasrul Hakim Ahmad.

Kejuaraan debat itu adalah anjuran Kelab Debat USIM dengan kerjasama Unit Kepimpinan Bahagian Hal Ehwal Pelajar universiti.



**PESERTA** debat dari Pusat Tamhidi dinobatkan juara dalam Kejuaraan Debat Piala Naib Canselor USIM di Seremban, Negeri Sembilan, baru-baru ini